

ZBOG ODBIJANJA VAKCINACIJE DJETETA

U ZDK za nepune tri godine kažnjena dva roditelja, u KS samo prošle godine 222

Kantonalni sanitarni inspektor u Zeničko-dobojskom kantonu od 2017. godine, kada je počeo s radom, zaprimio je dvije prijave domova zdravlja za dvoje djece čiji su roditelji odbili vakcinaciju.

Kazna do 2.000 KM

Kako navode iz Kantonalne uprave za inspeksijske poslove, u oba slučaja od strane inspekcije pokrenuti su prekršajni postupci, izdavanjem prekršajnih naloga roditeljima.

"Zakonom o zaštiti stanovništva od zaraznih bolesti predviđena je novčana kazna od 100 KM do 2.000 KM za fizičko lice ako ne obavi imunizaciju. Kada se obaveza odnosi na maloljetnika za prekršaj će se kazniti novčanom kaznom roditelj odnosno staratelj, ako propusti dužnu brigu za maloljetnika", navode iz Inspekcije, uz napomenu da na području Zeničko-dobojskog kantona pojedine općine imaju jednog ili više sanitarnih inspektora tako da je broj sankcionisanih roditelja vjerovatno veći.

Odgovornost domova zdravlja

Pojašnjavaju da su zdravstvene ustanove koje provode program obavezne imunizacije, dužne voditi evidenciju o izvršenoj imunizaciji za svaku osobu koja podliježe toj imunizaciji. Svi podaci o izvršenoj imu-

nizaciji unose se u osnovnu dokumentaciju obaveznika vakcinacije – "Karton vakcinacije" koji se nalazi u kartoteci vakcinacijskog punkta kojem gravitira taj obaveznik vakcinacije. Isti podaci unose se u "Iskaznicu vakcinacije" koja predstavlja ličnu dokumentaciju i koju vakcinisana osoba zadržava kod sebe ili u zdravstvenu knjižicu osiguranika.

"U iskaznicu vakcinacije ili zdravstvenu knjižicu potrebno je upisati i datum kad je planirana sljedeća vakcinacija. Ukoliko osoba/roditelj ili staratelj odbije dodatnu vakcinaciju/revakcinaciju djeteta, doktor medicine izdaje potvrdu o nekompletnom vakcinacijskom statusu, a zdravstvena ustanova obavještava nadležnog sanitarnog/zdravstvenog inspektora", navode iz KUZIP.

Oštro u Kantonu Sarajevo

Istovremeno, sanitarni inspektori u Kantonu Sarajevo su samo u toku 2019. godine po službenoj dužnosti dostavili ukupno 414 poziva roditeljima/starateljima da se izjasne o razlozima odbijanja vakcinacije. Pozivu inspektora se odazvalo 325 roditelja, od kojih je 222 odbilo vakcinaciju djece, te su im radi propuštanja i zakonske obaveze izdate novčane sankcije u ukupnom iznosu od 22.200 KM. Od navedenog broja, 103 roditelja su se izjasnili da će vakcinisati dijete u dodatno odobrenom roku od dva mjeseca. (E.Š.)

CRVENI KRIŽ GRADA ZENICA

Prikupljeno 80 doza krvi

U prvoj ovogodišnjoj dvodnevnoj akciji dobrovoljnog darivanja krvi, održanoj proteklog četvrtka i petka, koju je organizovao Crveni križ Grada Zenica, prikupljeno je 80 doza krvi. Iz Crvenog križa se zahvaljuju svim sugrađanima, uposlenicima Instituta za zdravlje i sigurnost hrane Zenica i učeni-



cima Druge gimnazije u Zenici, koji su darovali tečnost koja život znači. (A.H.K.)

Interreg

Mediterranean

TEESCHOOLS

Project co-financed by the European Regional Development Fund

ODRŽANA REGIONALNA KONFERENCIJA TEESCHOOLS PROJEKTA

U sklopu realizacije dijela projektnih aktivnosti, dana 28.01.2020. u Zenici je održana regionalna konferencija u okviru projekta TEESCHOOLS (Transferring Energy Efficiency in Mediterranean SCHOOLS - "Transfer energetske efikasnosti u mediteranskim školama") koja je okupila predstavnike vlasti sa područja Zeničko-dobojskog kantona, stručnjake iz oblasti energetske efikasnosti, direktore osnovnih i srednjih škola, nastavno osoblje, učenike i studente, te predstavnike ostalih zainteresiranih organizacija.

TEESCHOOLS projekat je odobren u okviru Programa transnacionalne saradnje Interreg Mediteran 2014-2020 (Interreg MED) sa ciljem promocije održivog rasta u mediteranskom području, poticanjem inovativnih koncepata i prakse, te razumnog korištenja resursa podržavajući društvene integracije kroz integrisani teritorijalni pristup koji se temelji na saradnji. U projekat je uključeno ukupno 14 partnera sa područja Italije, Španije, Grčke, Hrvatske, Kipra, Francuske i Bosne i Hercegovine. Jedan od partnera na implementaciji projekta je i Stručna služba za razvoj i međunarodne projekte Zeničko-dobojskog kantona.

Tokom održane konferencije predavači su prezentovali unaprijeđene alate i značaj TEESCHOOLS projekta, te upoznali učesnike s prednostima koje projekat donosi.

U ZENICI ODRŽANA REGIONALNA KONFERENCIJA

TEESCHOOLS - Transfer Energetske Efikasnosti U Mediteranskim Školama



U okviru implementacije aktivnosti projekta TEESCHOOLS - Transfer energetske efikasnosti u mediteranskim školama, proteklog utorka, u Zenici je održana regionalna konferencija, na kojoj su predstavljene unaprijeđene politike i alati projekta. TEESCHOOLS je projekat odobren u okviru Programa transnacionalne saradnje Interreg Mediteran 2014-2020 (Interreg MED) sa ciljem promocije održivog rasta u mediteranskom području, poticanjem inovativnih koncepata i prakse, te razumnog korištenja resursa podržavajući društvene integracije kroz integrisani teritorijalni pristup koji se temelji na saradnji.

Rezultati projekta

U projekat je UKLJUČENO 14 partnera iz sedam različitih zemalja, a jedan od partnera na implementaciji projekta je i Stručna služba za razvoj i međunarodne projekte Zeničko-dobojskog kantona. Vodeći partner je ENEA - Državna agencija za energijski razvoj, nove tehnologije i ekonomski razvoj iz Italije. - Pored vodeće, imamo i ostale partnere iz šest zemalja - Grčke, Kipra, Hrvatske, Španije, Italije i Francuske. Projekat ima za cilj da širi nove koncepte održivog razvoja, da se razumno koristi energija, posebno u mediteranskim zemljama, s ciljem da se to prenese i na ostale javne ustanove u BiH. Kada je u pitanju Zeničko-dobojski kanton, i grad Zenica, uspjeli smo da ovim projektom obezbijedimo Zelenu knjigu, predstavimo neke nove koncepte, predložimo ih našim vlastima kako bi se oni i zakonski usvojili. Također, nudimo i finansijske i tehničke šeme i rješenja, kako da se dođe do određenog fonda, određenih sredstava iz EU fondova, kako bi se te škole obnovile, istakla je koordinatorica projekta, Aida Redžić-Švraka, ispred Stručne službe za razvoj i međunarodne projekte ZDK.

Pet škola iz ZDK uzelo učešće u projektu

Zahvaljujući ovom projektu, dosada su obavili pet audita u školama: OŠ „Ali-

ja Nametak“ Visoko, Gimnaziji „Muhsin Rizvić“ Kakanj, OŠ „Kulin ban“ Tešanj, OŠ „Hamza Humo“ Babino - Zenica i OŠ „Žepče“ u Žepču. - Upriličili smo i dane otvorenih vrata i elektronske kurseve u pomenutim školama, kao i u OŠ „Meša Selimović“ u Zenici, a veliki odziv učenika imali smo i u Prvoj gimnaziji Zenica. U projekat su se uključile i druge škole, ali bih izdvojila Univerzitet u Zenici. Imali smo veliku podršku, kako od nastavnog osoblja, tako i od studenata, istakla je Redžić-Švraka. Prilikom realizacije pilot aktivnosti, odnosno provođenja energetske audita u određenom broju škola u ZDK, fokus je bio na školama u kojima je najmanje provedeno mjera energetske efikasnosti. Jedna od pet škola u ZDK koja je dobila energetske audit, i koja može poslužiti kao primjer dobre prakse, jeste i OŠ „Hamza Humo“ Babino. - Tokom 2016. i 2017. godine, uspjeli smo ostvariti saradnju sa Državnom agencijom ENEA iz Italije, koja je i vodeći partner u projektu. Naredne tri godine, prilikom saradnje, dolazio nam je tim stručnih eksperata iz Italije, gdje su procijenili da smo jedna od prioritarnih škola da se može i treba uraditi audit. Tako da smo među prvima uspjeli dobiti audit, u kojem su urađeni proračuni i procjene maksimalne i najbolje uštede koje se mogu uraditi u školama, a to je, svakako, jedan od prvih koraka i dokumenata s kojim se može aplicirati za neka sredstva i donacije koje se mogu realizovati, a da bi se ostvarila ušteda u školama, istakla je nekadašnja direktorica Škole, Indira Hukić-Smajić, sada nastavnica matematike i informatike, ističući da je vrijednost radova na krovu procijenjena na oko 140.000 KM. - Završili smo dio zamjene stolarije koje su finansirali Ministarstvo za obrazovanje, nauku, kulturu i sport i Vlada ZDK, što je koštalo 65.000 KM, a ostali su nam radovi na fasadi, kao i sve popratne stvari koje podrazumijeva audit, istakla je Hukić-Smajić.

Iako je projekat trebao biti završen do 31. januara, zbog njegove obimnosti, bit će završen krajem marta, kada se očekuje i završna konferencija. (A.Hrnjić-Kukić)